

阿文成公年譜

阿文成公年譜卷八

受業

王昶勘定

盧蔭溥增脩

第七卷那彥成恭纂

乾隆三十八年

二月初七日

公借明亮奏言

臣

等於正月二十日亥刻派令興

兆德赫布等帶兵進攻納扎木山梁又派王萬邦
扎爾桑等帶兵從納扎木下溝穿箐攻奪西一帶
山梁臣阿桂明亮督同奎林和隆武等進攻納圍

正面山梁分撥已定至二十一日子刻北風大作
雨雪交加臣等督飭官兵乘此風雪賊番不備之
時分隊前進其越溝穿箐之兵不避險滑先已潛
至西山峯之下卡內賊番知覺放鎗迎敵我兵鼓
勇直前躍入卡內賊番不能抵禦踉蹌奔竄我兵
卽將西山梁佔住其大石卡三座小石卡七座同
時攻克臣阿桂等所帶之兵直抵賊礮崖下賊番
出礮抵拒臣等督兵攻擊殲賊數名賊仍入礮固
守憑高據險鎗礮齊發臣等隨令官兵將前次所
砍木植豎立木棚以資遮護並建礮臺運礮轟擊

其德赫布一路官兵亦同時發礮礮內賊番多有
轟斃者此次總計殲戮賊番不少而官兵受傷者
不過數名臣等復察看靠東礮下有細路一道緣
陰坡冰雪甚深是以賊番砍伐柴木及往來通信
俱從陽坡行走臣等派令官兵向前安設營卡三
座逼近此路一見賊番踪跡卽行擊打日間賊已
不能往來查當噶爾拉山梁綿亘幾二十餘里雖
賊番十四礮之外又有橫牆石卡互爲聯絡但地
面較長守禦不能處處俱到臣等審度情形若乘
間奪取中間一二礮以破其勢此外自無難於攻

克隨於二十四日晚派撥侍衛章京將弁等分爲
五路均於亥刻以後進發臣阿桂明亮同奎林等
仍由正南山梁攻擊適福康安送印來營一同領
兵直逼賊人礮卡之下而礮外築有石牆牆外護
以木柵掘有深濠濠中松籤密布且潑水凝冰難
以逕越臣等指示官兵誘賊出礮中隊之兵佯爲
撤退而令左右官兵潛伏山腿巖礮之旁賊番約
有百餘望見撤兵一同壓下伏兵俱發其中隊官
兵亦卽回身奮擊殺賊過半其餘仍入礮死守鎗
石齊下並用礮抗拒我兵施放新鑄大礮當將賊

礮轟去並傷斃賊人從此賊礮內卽不復放礮其
博靈阿和隆武等帶兵由納圍正面山梁之東溝
底前進攻打亦擊斃多賊正在相持之際而綏庫
三寶等由納圍納扎木中間小路進兵已逼近賊
卡之下賊番出礮抵禦經官兵合力奮攻賊番敗
走上山又復從後放鎗擊打據巴旺布拉克底土
弁認明擊斃金川大頭人二名小頭人四名其餘
殲斃三十餘人其德赫布興兆王萬邦等兩路亦
擊斃二十餘賊因賊番悉力守禦自寅至酉各路
官兵始行撤回伏查當噶爾拉山形賊礮愈近崖

勢愈陡官兵步步仰攻殊爲費力此次我兵奮勵
勦殺多番且殄其頭目定當寒心奪氣臣等惟有
悉心籌畫亟爲摧破之計且現得之靠西山峰官
兵營壘高與賊礮相等凡當噶爾拉之後如克舟
九寨及金川中間之河皆可望見雖賊番衛死心
切若出其不意間道進攻賊自不能久拒奏入

諭曰此次官兵進勦當噶爾拉雖未能全克賊寨而阿桂
等調度有方帶兵將領俱能奮勇出力奪礮殲賊甚屬
可嘉阿桂明亮着交部議叙其在事之將領弁兵著阿
桂等查明核定功績等差咨部分別議叙又

諭曰細核阿桂等摺內所奏情形二十日雪夜攻克大小石卡係王萬邦扎爾桑等一路之功二十四日擊斃賊目係三寶綏庫等一路之功其餘在事出力之將弁雖勇往相同而功績不及着阿桂等據實查明核定等次咨部分別議叙至阿桂以當噶爾拉山梁綿亘欲出其不意奪取中間賊礮所籌極是惟在阿桂審度機宜乘間采入以成掃穴擒渠之績溫福等均當努力妥辦共建殊勲將此一併通諭知之

十二日

諭曰阿桂著在議政處行走

十五日

公偕明亮奏言正月二十九日亥刻賊人因納圍之旁林樹深密潛出百餘人偷竊營盤官兵早有預備放鎗迎擊賊衆當卽敗逃次早察看溝內雪上尙有踪跡蓋因夜間官兵追趕甚急賊番不能徑自回礪潛入林中躲避遂酌派官兵下溝搜捕果有賊七八十名潛伏直待官兵逼近始於箐內突出我兵奮力向擊殺死賊人甚衆受傷奔逸者僅十餘名至納扎木靠西山梁前經官兵佔據現又令五岱等設法拏卡再行進逼以便攻擊二月

初二日子刻五岱等帶兵三百名乘賊不覺前往
奪據礮前山梁賊人驚起放鎗迎敵我兵一面擊
卡一面擊賊比及黎明賊始敗退現已擊卡二座
卡牆一道相距賊礮甚近俟將新鑄之礮運至梁
上望東平打卽爲得力而德赫布等所帶之兵又
順山梁自南而北向上合力轟摧賊番往來不便
其礮自難支守一得此礮卽可審察情形派兵繞
截賊後奏入報

聞

公又偕明亮奏言前巴旺布拉克底士司等差其

頭人赴營稟稱現有納爾布普寺喇嘛帶領徒弟
並小金川番民男婦共十五名從金川出至土司
地方應否准其進卡土司不敢擅專臣等隨令派
撥土兵管押送營今於正月二十七八等日陸續
到來臣等以該喇嘛等既從小金川同僧格桑竄
入金川何以此時復行投出且又帶領多人恐其
中不無鬼蜮伎倆遂令分別看守臣等親加訊問
據老喇嘛簇爾齊木擁隆供我係哲木諾寨人向
住小金川墨爾多山納爾布普寺因僧格桑叫帶
徒弟前往念經遂被畱任曾屢勸僧格桑投誠僧

格桑不聽欲回本寺又復不許後又令赴布朗郭
宗念經未幾大兵攻破美諾僧格桑押合同往金
川行至勒烏圍見莎羅奔伊再三向說始得放回
昨到噶拉依沿途見有墨壟卡了等處番人被金
川搶去在彼饑餓不堪因係向來認識懇求帶出
我與索諾木傳事說明令人導引出來等語臣等
以番人素重喇嘛聽其自去尙爲情理所有至所
帶小金川被掠番民賊酋不爲阻止事有可疑復
加嚴訊矢供不移似無遁飾查簇爾齊木擁隆狀
已龍鍾似非狡惡之人其隨出人內精壯番丁亦

少且挾有眷口卽單身來者詢其親屬亦多在墨
壘卡了一帶居住但此等番民究難深信不可不
畱心防範除老幼婦女令其仍歸本寨外簇爾齊
木擁隆本係明正之人該土司現在軍營將其徒
弟喇嘛均交收管毋許卽回該寺其餘番衆交與
五福酌量分別安插統俟勦滅金川再令各回本
寨奏入

諭曰阿桂等奏連日築卡進逼情形所辦尙好至另摺所
奏將脫出之小金川喇嘛安插明正土司一事所辦未
爲妥協此等喇嘛旣與僧格桑素爲接洽難保其不探

聽內地之事與賊潛通消息斷不宜仍畱番境著傳諭
阿桂等卽將喇嘛簇爾齊木擁隆及其徒扎什策零洋
伊什隴藏三人押送來京以備訊問

二十二日

公偕明亮奏言查納圍山右面溝內樹木深密向
係官兵砍伐柴薪取雪融水之所二月初七日早
間經巡哨官兵見有賊人踪跡卽派兵設伏先令
一二人作爲取柴下山果有賊七八十人自林中
出銜尾潛行欲圖搶掠設伏官兵衝出擊斃十餘
人餘仍穿林奔去入礮踞守其納扎木兩旁林莽

亦有賊番潛伏經官兵衝擊殺死十餘名初十日
臣等派令官兵督同草布什咱嚕密章谷土兵下
溝搜捕又有賊數十人藏匿一見官兵踉蹌分竄
查官兵於納扎木靠西山梁擊築石卡距賊雙礮
甚近而欲遠出其後必經此礮之旁賊番因官兵
愈近守禦愈嚴必須大礮轟摧使賊礮殘毀始可
趁勢攻撲今將新鑄大礮運至靠西山梁施放賊
礮亦多孔穴且時見有賊人隨礮轟去者而現在
銅斤短少將前此炸裂之礮鎔化改鑄於十一日
復鑄成大礮一位送上山梁由納圍正面合力轟

擊日內當益見頽墮卽可奪碉采入奏入報

聞

公又奏言二月初八日准溫福來咨以現奉

諭旨令籌辦駐防丹壩事宜其松潘鎮總兵五福是否可
以調往查防範賊會竄逸事關緊要但五福所辦
降番係由別斯滿美諾南抵卡了約咱又加以汗
牛一路寨落隔遠戶口繁多必須五福辦理方爲
妥協而董天弼久在川省雖於各土司原委頗爲
諳悉但前隨阿爾泰辦事意存姑息不能歷服土
司非緯斯甲布等所敬服丹壩與之接壤實非所

宜至丹壩一路有兵一千數百名加以本地番民不但堵截賊酋並可審度形勢隨時攻擊自非明幹之員不能勝任五福年力方剛爲人明白勇往丹壩土司又係松潘鎮所屬若令帶兵往駐自爲得力現在_臣等督兵分剿金川三路形勢雖各不同然於賊酋緊要門戶尙未摧破此時未必卽爲遁逃之計且劉秉恬等所謂川兵約至美諾亦尙需時日_臣等一面奮力進攻一面催令五福將降番迅速查辦並咨明劉秉恬酌量該鎮應行起程時卽令帶兵前往奏入

諭曰前因計及逆會當窘蹙之時必由丹壩搶掠逃往郭
羅克曾諭董天弼帶兵防截嗣溫福奏請令五福前往
彼時因董天弼於番地較爲練習故令其仍遵前旨令
阿桂奏稱董天弼從前辦理番情意存姑息不能壓服
各土司是董天弼於丹壩駐防之事實非所宜至五福
朕雖未能深知其人既據溫福阿桂等奏其明白勇往
年力正壯自可望其得力已如阿桂所請行著再傳諭
五福奉到此旨卽速起程務須實力奮勉加意防範並
善爲駕馭該處番衆勿令驚疑

公又奏言查索諾木凶頑悖逆當滅亡在卽猶敢

肆其狂吠前來投稟

臣

詳察賊情蓋因大兵四面

環攻勢難久禦轉爲誇大之詞希冀或寬誅戮是

其詞愈誇適見其心愈餒而其狂悖愈甚則愈爲

天理所不容其取死亡亦必愈速

臣

前此進抵當

噶爾拉以賊酋本與蟲蟻無異惟當竭力勦擒不

值更通言語當飭各營弁兵並屯土各兵卡如有

賊番叫喚均卽用鎗擊打一切置之不理惟於前

月二十五日接仗時有賊番叫問新降番衆我們

皆係自家骨肉何以如此替官兵出力

臣

令降番

等告以我們自投順

天朝礪房地畝絲毫不動其派出打仗之人每日皆給口糧不須婦女餉送所有餘存鹽菜銀兩並可帶回家用在家之人仍得照常耕種且陣亡者給有念經銀兩受傷者又有養傷銀兩多殺金川一人又多蒙一分賞賜緣何不肯出力賊番聞此俯首無詞似覺心動時有賊目見此光景卽舉矛桿驅戰我兵望見真切遂放鎗將賊目二人擊斃此外並無更通一語是以賊人無從再來投稟臣今已分路進攻惟有堅持必滅之志尅期采入至兩金川及鄂克什三雜谷丹壩草布什咱綽斯甲布巴旺

布拉克底各番人俱係跣足披髮步行山箐謂之
甲壟其德爾格忒麻書章谷納林冲等番人習於
馬上風俗與蒙古相似謂之霍爾族類各殊本非
一種今既殄滅小金川起自雜谷腦南達打箭爐
官兵已橫亘於甲壟諸部之中其在金川右界者
惟綽斯甲布一土司北界者惟從噶克丹壩兩土
司賊酋索諾木等卽窮蹙竄往綽斯甲布等處以
臣愚見土司斷不敢畱而霍爾各部非其同類更
不肯容情藏匿若逃往郭羅克中間尙隔丹壩從
噶克境此各土司亦必無任其逋逃之理至郭羅

克有上中下三部落內惟中郭羅克土千戶瑪克蘇爾滾布素不安分然戶僅數百設索諾木等逃入其境現在兵威辦理非難茲蒙

訓示精詳令派兵往駐丹壩先事預防賊酋更無從免脫而丹壩於現有漢土兵七百名外再添一千一百名實可分綴賊勢於征勦之局更爲有益總之逆酋等罪惡貫盈神人共憤一俟勦洗金川則兩逆酋斷無逃死之處必能駢縛生擒以彰顯戮奏入報

聞

三月朔一日

公偕明亮奏言

臣

等進攻當噶爾拉山梁督率官

兵將新鑄礮位晝夜上緊轟擊數日以來賊番知

官兵搜勦嚴密難以輕犯不敢出礮至納扎木一

路

臣

等復令德赫布等將營盤礮臺向前設立距

賊礮不過一箭有餘度其必來衝壓正可痛加殲

戮而賊番僅於礮內放鎗死守

臣

等督飭工役復

造大礮三位運至納圍納扎木各山梁分頭摧擊

使賊不知將從何處進攻即可乘其罅隙爲殺賊

奪礮之計現今賊礮已漸頽毀惟是山勢旣高雨

雪愈甚雲霧迷漫之際賊礮至近亦時不能見加以坡礮陡窄路滑泥深兵力更難施展俟天氣稍晴卽當督兵攻撲現在兵氣奮揚卽土練等亦人人各思自効自不難於乘機竄入奏入

諭曰阿桂等奏用礮轟擊賊礮已漸頽毀因連日雪霧稍俟晴霽進剿等語因思雪霧迷漫之際我旣不能時見賊礮則官兵踪跡賊亦不能窺伺若乘此時派兵潛往攻其無備或因而得手亦未可知前此西師恢復瓦爾齊時曾因霧得勝溫福阿桂皆所深知自可做用其法但番地坡陡徑仄兼之近日雪深冰凍與西陲之地可

以馳擊者不同則又當各就形勢妥辦不宜冒險輕進
將此傳諭溫福等與彼詢商伊等務悉心斟酌以期萬
全勿因朕有此旨稍事勉強遷就也

公又偕明亮奏言二月十三日僧木則頭人阿開
將脫出之小金川人安都爾送至當噶爾拉

臣等

問以如何脫出據稱金川頭人派人往僧木則偷
放夾壩令我帶路行至相近僧木則地方誑說採
聽先行遂投族叔頭人阿開寨內等情

臣

等復問

以金川百姓情形又稱金川各寨糧食極貴小金
川逃往之人饑餓不堪俱欲逃出其金川百姓皆

知索諾木等肆行狂悖爲王法所必誅人人有畏死之意臣等揣度賊情金川地境四面環山各路官兵初辦雖覺其難然人心惶懼耕作漸荒若攻破一兩處則其瓦解之形必與小金川無異所有該番安都爾卽畱在軍營供役並仍加意防範奏入報

聞

初七日

公偕明亮奏言臣等前此移營逼近賊碉用礮轟擊因遇雨雪連綿稍稽進取茲於二十四日畧見

開霽遂卽分兵四路均於二十六日子時以後陸續進發三寶綬庫等帶兵潛至礮前察看礮外有牆牆外有濠濠外復有木欄守禦重疊卽督官兵拔開木欄躍過深濠推倒石牆賊番放鎗拋石抵死拒守官兵奮勇不顧直前貼近礮根轉爲賊鎗所不及賊知放鎗無益擲石下擊維時天色漸明官兵見露身擲石之賊卽舉長矛向戳並用箭仰射隨將礮根挖開洞穴拋入火彈礮內共有三層火彈所及僅在下層不能得力官兵復身帶火彈卽於礮角奮勇攀登墜下復上將火彈拋上礮頂

其上排有橫木鋪設石板塗以泥土火彈亦不能
燒官兵憤切又將北面礮根刨挖拆毀礮內賊眾
共有五十七人一時殲戮無遺並將頭人克鄂殺
死其躍出礮外賊番六人官兵斫死三人鎗擊墮
入山箐雪窖二人惟剩生口伊什一名當將此礮
佔住查所得之礮係自西而東之第五礮其東面
各礮內賊番前來接應經官兵上前迎擊鎗斃二
十餘名仍退入迤東各礮固守靠西山梁一路雖
官兵所築石卡距賊甚近但賊礮據於高礮其旁
路徑曲仄必須螺旋而上及至礮根又不能容數

人並立並無別路可以繞越而賊番固守鎗石如雨其出礮拋石放鎗者被官兵殺死亦二十餘名攻至抵暮始漸次撤回臣等卽令侍衛將弁等於佔據賊礮處所設立營盤並於三寶綏庫等原帶兵一千數百名外添撥陝甘兵五百名令總兵伊常阿協同駐守以防偷劫是夜三更後賊番果分兩路來攻新立營盤連撲五次均被官兵擊退伏查當噶爾拉山梁大礮排列俱於扼要之地聯絡聲援守禦實爲嚴固現今攻破中間一礮斷其聯絡之勢但山樹陰森道路叢雜積雪倍深於陽坡

尙未能竟絕其往來出入臣等當設法繞截分攻使賊四顧不暇自必不能持久奏入

詔曰阿桂等奏分兵四路奪礮殺賊情形均屬奮勉可嘉而三寶綏庫等率衆先登尤爲勇敢著交部從優議叙阿桂明亮調度有方其餘各將領亦俱出力均著交部議叙並著阿桂將在事將領弁兵等實在出色應加鼓勵者奏聞分別查辦

公又奏言前奉

諭旨以糧員王嘉猷於泥峙岡途中遇賊添派後路防兵令臣等籌畫妥辦據溫福抄寄覆奏摺稿內稱功

噶爾拉一路原帶滿漢官兵一萬七千餘名又各
土兵四千餘名分防駐守各處外現存打仗之兵
祇有六千餘名實不能抽減應仍酌調川兵備用
等語臣查當噶爾拉軍營漢土官兵雖有一萬五
千餘名但應防後路既多將來攻進後左右悉係
賊寨又須逐處畱兵現有之兵勢難抽撥如巴旺
布拉克底連界之馬爾邦馬奈係乾隆十二三年
進兵之路與賊境在在犬牙相錯必須設兵重鎮
於牽制之中並寓防範之道今僅分漢土兵一千
四百餘名前往駐守其草布什咱地方均與金川

相連今亦僅留漢土兵一千七百餘名分段巡警
以上各處防兵勢難再減至綽斯甲布一路官兵
合計共有一萬五千餘人但近日分兵宜喜日旁
兩處節次臨陣損傷及病故者諒復不少誠如

聖諭自不宜更爲抽撥

臣

再四思維如溫福議稱酌調川

兵固爲近便第川省實在馬步兵共二萬五百餘
名除駐防西藏一帶台站及分撥塘汛一萬二百
餘名外其存營存城兵一萬九千二百餘名計自
前歲以來分派西南兩路實止存營存城四千三
百餘名川省幅幘遼濶且西南界均與猺夷番衆

毗連不可無兵彈壓而各州縣囑匪最多尤須弁
兵查拏稽察况卽此四千餘名內遇有運送火藥
鉛丸軍械等項尙須隨時遣派前次劉秉恬董天
弼酌調川兵一千六百名赴丹壩美諾已覺難辦
此外自不便再調且此等揀存餘兵零星攢湊卽
至軍營恐亦不能得力臣伏思黔省官兵西路原
調六千南路原調二千今南路自去年五六月間
卽已僅存黔兵一千一百餘名懸揣西路原有之
黔兵此時亦只可剩四千有餘蓋黔兵本無餘丁
凡有陣傷亡故出缺仍咨回本省募補是原調雖

共八千其實只有五千餘人卽再調二千尙與原調之數有減無增况川省如夔州協等處距省二十餘站而黔省之威寧畢節卽與四川永寧接壤核其道里與派調本省官兵程途不甚相遠以之派往綽斯甲布軍營亦不致多需時日但聞黔省新補之兵幼稚俱多恐技藝未能嫻熟如蒙

兪允請飭下黔省巡撫提督仍於舊兵內選派進剿巡防始收實用奏入

諭曰阿桂奏請調撥黔兵二千名趕赴綽斯甲布備用此時似可毋庸再辦前旨令熟籌抽撥係指川省兵丁而

言今川省已調派一千六百名分赴美諾丹壩等處此外原無可再調至黔兵雖尙得用但該省亦係苗疆需兵彈壓自不宜屢有調遣且川省現在各路官兵俱已深入續調亦恐不及或綽斯甲布一路實有必須添助兵力之處朕又難於懸定已諭令圖思德拜凌阿於黔省近川各營現有舊兵內預挑二三千名聽候調撥著傳諭溫福阿桂豐昇額彼此札商通盤籌畫如果必需則一面調取一面奏聞

十七日

公偕明亮奏言

臣

等查當噶爾拉山梁形勢險峻

前此從納扎木進取俱係向上仰攻雖佔據靠西山梁與賊地勢相等亦只一面用礮轟擊作三路進取之勢今既於克礮處所修立營卡橫截賊礮不但各礮賊番難以彼此照應而官兵與賊已共在一道橫梁之上當將趕鑄大礮運至新立營盤東西分擊昨復相度地勢令官兵將營卡展開逼近西面賊礮轟打是前次三路進攻者今已成五路賊勢漸形窘迫每日惟潛藏礮內偶於礮眼放鎗及於遠處放礮而官兵因相離不遠更易於察看偶有往來踪跡卽放鎗礮是以數日以來擊死

賊番不少賊亦不敢復多出入其西邊之礮距礮
甚近力量猛而有準現已一半頽墮其東邊礮座
雖堅然亦已多洞穴惟是雨雪連旬兼以大霧往
往咫尺不能辨別况凍融泥滑官兵行走爲難臣
等心急如火總須快晴幾日卽行攻撲以期必得
奏入報

聞

公又偕明亮奏言查此次官兵進剿當噶爾拉所
鑄大礮用之一二日卽易炸裂臣等不但因改鑄
需時心存焦急亦恐兵丁受傷乃近日礮裂時毫

無傷損此皆上賴

皇上威福

天神垂佑兵丁等得藉以無恙茲復仰荷

聖慈諄諄垂詢曾否傷人凡在行間自無不動心之理

臣

等已通傳各營令兵丁等益知感激奮勇圖報再

臣阿桂久在軍營於鑄礮事宜閱歷稍多當初造

之時鍊銅欲淨及既成之後試響宜清苟工夫火

候之俱全自不致有他慮無如

臣

等進攻心急不

暇更番鎔鑄多延時日是以不無損裂現在

臣

等

當囑爾拉一路所鑄礮位四座運至各山梁分頭

轟擊均尙爲得力奏入報

聞

二十三日

公偕明亮奏言納圍山腿之旁樹木叢雜賊番往往偷來潛伺動靜臣等令官兵於每日丑刻以後下溝至日出後賊番瞭望可見之時先回一半其餘一半仍行潛伏使其不覺以便剿殺三月初九日辰時果有賊數十人陸續伏地爬來我兵上前截殺擊斃十餘名維時我兵尙在崖坡追擊其山梁上賊衆俱集於卡內向南一面往下放鎗接應

臣等令官兵將大礮對准施放當將卡牆正中擊穿礮子從賊叢中直過眼見擊中六七人賊匿入地窖情頗窘迫惟是日來晴雨不定初十日夜雪尤甚營盤左右積二三尺山陡路滑實難措足臣等不敢坐守現在督率官兵乘夜冒雪增築礮臺俟晴攻取奏入報

聞

公又奏言查綽斯甲布一路進兵最關緊要本年正月間工噶諾爾布遣其頭人來營請安臣告以聞工噶諾爾布頗有心曾從前金川將綽斯甲布

官寨大門砍破又殺汝土司族弟草布什咱土司
汝土司因有重仇不肯修整寨門以示必欲報仇
之意今大兵進勦金川汝土司正當乘時洩忿不
應尙有游移現在大兵三路分攻各土司當自行
酌量等語使其知所愧奮嗣該頭人去後工噶諾
爾布復遣僧格爾嘉勒來營叩稟臣又將不滅不
休各緣由反覆詳示僧格爾嘉勒頗能領會查僧
格爾嘉勒族兄松乃係綽斯甲布大頭人善於帶
兵向與金川有隙去年因被霍爾章谷拘畱經臣
嚴飭放回後又患病是以未及領兵打仗今松乃

上嘉之

已往宜喜督兵自必較前奮勉而計價格爾嘉勒
此時應回該處工噶諾爾布亦必專心助勦奏入

閏三月初五日

公偕明亮奏言當噶爾拉山梁前因雨雪連綿未
能攻撲臣等體察情形自西而東之第四礮經官

兵用礮晝夜轟摧本已頽毀茲自三月十九日後
天氣開霽自當速爲進攻但臣等思現在官兵雖

於前此所克第五礮處設立營卡橫截於山梁衆
礮之間已斷賊番聯絡形勢然尙未能卽扼賊番

要害若將靠西山梁賊番第一雙礮之東第二礮
先能攻得則納扎木三四兩礮前後夾攻更易於
克取而緊接納圍東邊之第八礮若再能佔據則
六七兩礮左右皆係官兵營卡賊番勢孤難守當
撥官兵於二十一日夜陸續分進潛至各礮崖礮
之下而賊於第四礮西坡礮旁修木石太卡三座
又於礮旁之溝設立兩層木柵防禦頗爲嚴密臣
明亮同三寶伊常阿綏庫督率進攻官兵均以雨
雪稍稽心懷憤切鎗箭齊發拔柵過濠與賊短兵
相接直逼礮根隨於礮牆轟塌處踴躍攀援而上

賊番放鎗不及紛紛潰逃當被官兵殺五十餘人
受傷竄走墮入崖下雪中者又有四五十人其攻
第八碉及攻靠西山梁第二碉之官兵亦至碉下
溝邊竭力奮攻賊番鎗石如雨未能遽克且時已
日中冰泥融化難以用力始漸撤回賊番因連次
受創並不敢出碉拒敵間有往來接應者又被官
兵擊斃約有五六十人當卽令將所得碉卡拆毀
另派官兵拏卡與前此所得第五碉地方營盤聯
絡駐守查此次進攻賊番不敢明來接仗但如所
攻之第四碉賊番於碉外多添卡座彼此應援且

編結柳條中實泥土以爲卡牆藉此禦礮又於礮卡內深窟地窖地窖之旁斜上穿眼藏身旣固放鎗復便死守之謀實爲周密但如此抵拒而第四礮竟行攻復則官兵之氣更覺奮揚此時營壘排列山梁之上所佔地面已寬其迤西各礮又可相機攻取奏入

諭曰阿桂等奏攻得山梁第四礮一摺在事之將領弁兵等奮勇可嘉著阿桂等查明存記檔案俟山梁礮卡全行攻得再交部議叙至第四第五兩礮連次攻得已隔斷賊勢令其首尾不能照應就此情形卽由攻克礮卡

之處乘勝采入固無不可但山梁未淨賊礪尙餘六座若不併攻克則後路未能肅清或爲賊所阻截轉屬不成事體阿桂務須設法全數掃除使官兵得以遡進無滯尤爲妥善向後天氣漸暖冰雪日融自更易於得手三路中有一路攻進其他賊勢自然潰解將來大勦克建雖勞績維均而先得首功者自必更膺茂賞著傳諭阿桂等勉力爲之

公又奏言

臣欽奉

諭旨詢問金川舊圖所開路徑查現在攻取之當噶爾拉山梁下梁卽係克舟九寨該處地廣寨多每寨番

民百戶及數十戶不等順河而東北卽係僧達地方若從巴旺布拉克底之深嘉卜一帶繞進固可前抵僧達但克舟九寨係在當噶爾拉後山山半而僧達尙在山下大兵若由此進攻是賊番轉據山上得以憑高抗拒恐未易得利今從當噶爾拉進攻一將山梁各礮克獲自高而下從克舟九寨直抵僧達自有建瓴之勢查僧達一處乾隆十二年總兵馬良柱曾經攻抵其地所以未能深入者爾時因無大礮爲其所阻今大兵若至此地則距噶拉依不過三四十里用礮轟摧無難攻取目

下金川賊衆在當噶爾拉據險死守若使大兵別
從深嘉卜地方進攻克舟九寨直逼僧達俾其前
後受敵更爲得勢而現在兵力不能再分臣查此
次三路進兵昔嶺一路距噶拉依本近然必攻上
昔嶺再將石城攻克始能直壓賊巢而綽斯甲布
一路若攻上宜喜日旁山梁其下卽係人衆田多
之地大兵至此則賊已失所依恃勒烏圍雖在隔
河勢亦搖動至臣現攻之當噶爾拉官兵營壘橫
截山梁在賊衆礮卡之間此時若連營而下未嘗
不可但山梁延袤二十餘里雪積凍深分駐分攻

所需兵力不少若復徑行前進勢不能多兵接續而各礮內皆有賊番乘間衝截後路不可不防必將當噶爾拉賊衆一律掃清始可整旅前進竊計此時全局情形臣一路官兵已上山梁未能下壓而溫福豐昇額兩路官兵又皆未上山梁所以於剿滅凶渠之局尙未敢遽言尅期蕝事此三路官兵內得一處攻開則賊番支拒已難若更攻開兩處則賊番之力量日形其絀臣於乾隆十三年在金川軍營時聽聞衆議皆以爲斷不能辦臣彼時頗爲憤切及前歲來至軍營尙無人敢言接辦之

事卽兵丁等言及金川輒皆動色相戒茲值小金川掃蕩接勦金川以來我兵日與賊番接仗各思奮勇見功毫無畏怯而屯練土兵等咸稱此次金川必滅並附近各土司喇嘛等亦皆虔誦得勝諸經以期速滅金川并有言賊酋於某時某月必滅特來稟告者人心如此

天意可知現雖礮位不無炸裂雨雪亦覺稍多但兵丁俱獲安全賊番鎗礮絡繹營盤之上而受傷者絕少此皆仰藉

皇上威福所庇而賊番滅亡之兆卽於斯可卜臣現在督

率官兵併力奮攻務在迅克當噶爾拉山梁進抵
僧達自可乘勢直搗賊巢奏入報

開

閏三月十一日

公偕明亮奏言臣等抵當噶爾拉時卽有賊番卡

外叫喚懇求說話臣等嚴諭官兵置之不理近於

三月二十一日復有賊番喊稱投稟臣等卽派兵

於二十二日攻得賊番喇卡自二十四日以後賊

番叫喚更急並云稟內並無觸怒之言將軍看見

自然滿心足意其兩路將軍處亦已具稟等語揆

揣其情似欲以送出僧格桑之言爲哄誘之計臣
等仍嚴切曉諭不許收稟伏思賊番詭計百出非
藉以窺探軍情是否必期勦滅卽藉以緩此路之
兵撤出番衆更爲抵禦他處之用其伎倆不過如
此今若收其稟帖或與通言語不但漢土官兵妄
生將就了事之心致多疎懈且使各土司疑大兵
未必卽滅金川伊等此時出力合攻致貽後患更
非所以堅各土司之心故嚴拒賊番投稟正所以
鼓官兵之氣并示土司以信俾共知此番必滅金
川金川旣滅則僧格桑爲釜底遊魂無可逃遁是

僧格桑就俘之遲早目前在所不爭惟一意掃滅
金川並擒二酋庶足以永綏邊徼

公偕明亮又奏言臣等於三月二十二日攻取當
噶爾拉第四碉戮賊衆因思賊番既失此碉必
乘夜間潛來偷刦是以另派官兵趕擊營卡於前
此所得第五碉地方營盤聯絡駐守賊見大兵防
範甚嚴是以不敢來擾至二十三日亥刻賊料我
兵因上夜毫無動靜此夜必不設防有二百餘人
從山溝箐林內潛爬而上直來偷刦巴旺布拉克
底土兵營卡是時雲霧甚濃土兵聽有響動均卽

放鎗賊番抵死衝至卡邊該土兵等各持刀矛短
接奮力砍殺至溝內箐邊而回比至明晨查看卡
牆以外及溝中雪上血迹甚多並有拖捧賊尸踪
跡及遺棄刀矛等物至二十四日以後所有各礮
卡內賊番較多於前防備更爲嚴密臣等思納札
木正面之第一雙礮與納圍正面之第七大礮雖
均據於峰巒陡峻之地仰攻殊爲費力然我兵已
搶得賊第四第五兩礮設立營盤從梁上新得第
四礮之營盤內由東而西將第三第二兩礮攻克
其納札木之第一雙礮固可不攻自破但陰坡旣

險雪凍尙凝我兵不能兩翼分抄察看賊番情形
又明知此第三礮爲大兵必攻之地增柵濬濠完
繕固守若專務先克此礮難免少稽時日查納圍
正路第六七兩礮形勢雖爲最高而前所得第五
礮之營盤距第六礮尙近連日密遣兵弁踴探若
山梁爬越進攻似可得手一得此礮則第七礮亦
易用力而於大局更爲得勢今將鑄成食二十二
斤子之大礮於二十九日運上山梁施放頗爲有
準力轟數日第六礮自必頽墮便可乘機攻撲惟
是賊番狡獪異常若稍露用力此處之意卽不免

更增備禦今臣等令迤西各營將各碉卡一律用礮轟摧使其不能測我注意何處以期乘間得利均奏入

諭曰阿桂等奏嚴拒賊人投稟一事所見甚是金川賊番屢次喊求投稟不過欲藉以窺探軍營消息若其計得售卽因以緩此一路之兵便可撤出賊番另爲別路抵禦之用斷不可墮其術中倘賊番以送出僧格桑爲詞尤不可聽逆酋如果稍知畏服從前卽不應爲小金川幫兵抗拒卽僧格桑投竄至彼亦當立時擒獻不應復爲容畱今見事勢窮蹙始欲藉此以求倖免其情罪實

難輕宥現在官兵各路進攻惟有併力掃蕩賊巢擒縛
兩逆豎以申國法而靖諸番更無別有游移之見如此
嚴切飭諭令土目等高聲傳告庶足使逆酋喪膽不敢
復生希冀而助勦之土司兵練等知官兵務在必滅金
川各無後慮並堅其踴躍用命之心卽將士等知此次
用兵有進無退亦可勵其勇往圖功之念若金川竟將
僧格桑送至軍營則前此屢降諭旨甚明卽可遵照妥
辦至所云兩路將軍俱已具稟若果有其事溫福等早
應入告其爲詭說已屬顯然蓋賊番借彼兩路爲詞以
圖聳聽其於彼兩路諒亦用此伎倆溫福練習已久自

不爲其所惑惟豐昇額初經任用閱歷未深恐臨時尙無定見可將此詳悉諭知再阿桂等奏賊番屢次偷劫土兵營卡俱經擊退追殺此等土兵出力者著阿桂傳旨酌賞賊番偷劫營寨乃其常伎且知伺隙潛踪接踵再至是賊番頗諳兵機其頑悖實爲可恨惟當隨地隨時嚴加防範不可絲毫疎懈若籌畫畧有未周所關非小

公又奏言查金川自郎卡至索諾木父子兄弟濟惡怙終實爲天理所不容斷無不卽滅亡之理且計其民戶本不多於小金川自十三年征勦以後

兼以各土司之相攻不復多有生聚而上年收復
草布什咱時被戮及助小金川接仗計其傷損番
民已爲不少此時大兵分路進討賊番不過樹堅
礮於至險必經之地恃以爲固而大兵進剿之初
賊亦尙能併力死守是以稍稽采入但各路官兵
每次進攻輒有殺戮而守礮守卡之賊被鎗礮擊
斃者亦無虛日况番地磽瘠居多每歲所收僅足
各番之食今四面環攻疲於奔命耕作多荒則饑
餒之患日甚堅守之氣漸衰其勢自不能久爲支
拒臣平日用兵謹慎久邀

聖明洞鑒必俟有可乘之機方爲攻撲之舉得尺得寸以
漸摧其要隘賊番勢屈力窮自不難於殄滅奏入
報

聞

二十日

公偕明亮奏言臣等自將鑄成大礮施放以來當

噶爾拉山梁第六礮漸次損壞但黑暗陰霧之際

賊仍偷爲修補更添木柵石牆臣等不勝忿恨察

看情形雖第六礮攻取稍難然若先取此礮則可

扼其要害因令扎勒桑等分攻納扎木正面第一

雙礮其納圍正面之第七礮派和隆武裴慎等進
攻並另派漢土官兵進攻納圍靠東之第八礮再
從上次攻得之第五礮處分爲三路令奎林三寶
等攻取納圍正面之第六礮臣阿桂明亮分頭督
率初九日子刻陸續前進至丑寅之交雪霧迷漫
官兵等潛行爬越及至黎明時奎林三寶之兵已
越過石卡兩處賊番知覺放鎗滾石官兵毫無畏
避直至大礮詎賊番守禦倍常礮外既護以石牆
木柵又均挖有濠溝橫斜交錯攔截徑路官兵奮
力將木柵砍斷並推牆填溝而礮卡內約有賊二

百餘人抵拒甚力鎗石交加官兵因繞至西北角
卡門直前攻奪賊番窘迫當有百餘人從東北前
來又有二百餘人由陰坡箐林而上思欲乘霧從
後衝突我兵看出分隊迎擊而滿洲及額魯特官
兵各用鎗箭殺死多人三寶亦親射一賊賊番勢
不能支踉蹌敗退一半竄入礮內一半由坡下箐
林逃匿其派攻第八礮官兵正在攻撲間有紅衣
頭人手持矛桿催逼賊衆出礮衝壓官兵卽放劈
山礮將其頭人擊斃而新降小金川番人亦頗勇
往經都司崔文傑督領殺賊二十餘名餘仍潰敗

入碣死守查當噶爾山梁固爲賊番緊要門戶而第六七兩碣之後有大山腿一道迤邐而下其勢直抵噶拉依尤屬金川要隘是以此兩碣倍極高堅守禦更爲嚴密未免暫稽攻克現在大礮轟擊過多又經損裂臣等一面趕鑄礮位一面另籌攻取以期先克此碣迅速前進奏入

諭曰阿桂等奏分攻納圍納扎木殺賊各情形將領弁兵俱甚奮勇出力俟攻得險要一并交部議叙

四月初一日

公偕明亮奏言臣等查納圍之第六碣與納扎木

之第三礮均係賊番要地若使對面拏柵賊番窺見我兵注意防守必嚴臣等因令第一礮與七礮正面均拏卡柵向前使之無從揣度而我兵繞從山梁上東西兩面分撲不難得手惟因連日雨雪尙於攻撲有碍倘兩三日快晴當卽督兵奮力上攻以期必得又本月十三日草布什咱土舍丹怎扎克巴送到該處脫出番人沙克置布木一名來營臣等親加訊問據稱係草布什咱博租寨人前在勒烏圍乘空逃出見勒烏圍噶拉依兩處牛馬羊猪殞死將盡人亦多有病者臣等思賊番滅亡

之兆已見惟有乘機奮攻以爲搗穴擒渠之計奏
入

諭曰阿桂等奏稱現攻納圍之第六礮與納扎木之第三
礮先令我兵於第一及第七礮正面向前接擊卡柵仍
擬覓間於山梁東西分撲使賊人無從揣度自是正辦
再據草布什咱脫出番人沙且布木供稱勒烏圍牛馬
羊猪瘟死人亦多病今噶拉依人畜亦俱害瘟此實羣
逆罪惡貫盈自取滅亡之兆將軍等自各胸有定見勿
稍有延緩使羣逆久稽顯戮

初三日

諭曰禮部尙書阿桂現在軍營敷歷宣勞著加太子少保以示優眷

初九日

公偕明亮奏言

臣

等查納圍第三四兩礮高據陡

崖之上下有小山腿一隻賊番築卡八處若出其不意分攻各卡可使疲於支拒隨於二十日夜大雨如注之際挑派漢土官兵二百名潛伏爬越突至卡前賊番未及防禦當將八處石卡同時攻獲臣等悉心籌議崖上礮座雖非前往噶拉依正路但得此礮亦可孤賊番之勢復於二十二日派漢

土官兵三百名乘夜攻近礪旁賊番抵死拒守鏖石如雨黎明官兵始行撤回至二十六日分路進攻納圍一路官兵潛至礪下正擬攀登而上忽濃陰密霧雨雪交加彼此不能望見賊番聞有聲響施鎗滾石往下壓打官兵難以用力因復徐徐酌撤惟納扎木官兵逼近礪卡賊因雪霧迷漫有二三百人潛出憑高下壓經德赫布等奮力迎敵立斃賊番十餘名奏入

諭曰連次派出之將領弁兵攻礪殺賊均屬奮勉但尙未得實在險要難以交部議叙均著查明存檔俟將來一

併交部錄叙

公又奏言

臣

查綽斯甲布一路兵力稍單昨據豐

昇額來札以屯兵旣不可得仍須奏調黔兵二千

名以資進剿並將所擬奏稿會商

臣

思黔兵奉

旨停止自必陸續回營但黔省本係預備三千名今若於

附近省城及威寧畢節一帶各營內調用二千名

入川尙近綽斯甲布軍營得此生力之兵士氣尤

加振奮而賊見官兵陸續增添更爲胆落一俟黔

兵到日豐昇額酌撥存營之兵分於後路駐守似

於進剿畱防均有裨益奏入

諭曰前因進勦金川再需酌調黔兵曾諭圖思德預行選
派續經豐昇額以現在毋庸調兵具奏隨又降旨令圖
思德停止今據阿桂奏豐昇額一路兵力稍單仍請添
調黔兵二千以資協勦等語著傳諭圖思德卽於附近
川省各營原備兵丁內揀選二千名迅令原派之員帶
領前往並令富勒渾於沿途經過應行預備之處早爲
妥辦

十六日

公偕明亮奏言臣等前兩次進攻本注意納圍一
路而於六七兩礮尤爲用力賊番於此處必悉力

固守其納扎木一路或防守稍懈三路並進似可
易於得手因於本月初三日丑刻分撥官兵漸次
潛進其東面之兵臨近礮根石崖陡峭潛密魚貫
而上其繞出礮後之兵因緣崖一綫僅能接踵前
行見礮後又有木柵一座木柵之下連接石卡五
座官兵直前先奪木柵攻撲甚急見有騎馬一賊
帶領二百餘人前來救援中鎗墮地官兵攻至申
刻礮卡內賊番鎗礮更緊勢難卽克因將兵漸次
撤回我兵亦有陣亡帶傷者爲數無多奏入

諭曰阿桂等奏稱攻勦山梁礮後木柵富有騎馬賊人中

鎗墮地其是否頭人著查明便中覆奏

公又奏言

臣

查綽斯甲布山險站長輓輸不易雖

丹壩之糧運通行而打箭爐資隆之長運仍須協

同輓送適值德爾格忒土司差伊頭人來至當噶

爾拉軍營

臣

面飭該頭人傳諭土司令其派烏拉

以供馱糧之用茲據按察使李世傑稟稱德爾格

忒派出烏拉四千除資隆截畱五百外其餘三千

五百俱已至打箭爐一次即可馱運三千五百石

等語

臣

查霍爾各土司內德爾格忒部落最大今

既首先派出烏拉四千則此外各土司願出烏拉

者必多且現當青草發生便於牧放番人得價受
雇亦必更爲踴躍奏入

上嘉之

二十三日

公奏言四月初九日接准

上諭查屯練原係雜谷番人自誅滅雜谷土司蒼旺之後
將其地分爲梭磨從噶克卓克采三土司又將附
近雜谷腦之五大營不立土司改設屯練三千隸
維州協管轄伊等人本驍勁又自詡爲

大皇帝番民不屑與土兵爲伍故於打仗之處較爲出力

但該屯練等既有應納之糧而三千餘名之兵并
一年犒賞所得總計不過數百兩尙不足以深結
其心且自進剿以來陣傷亡故者頗多情殊可憫
以臣愚昧之見若於內地營分內量加裁汰卽以
所省糧餉每屯練一名月給銀五錢土都司守備
千把外委亦以次量給月餉計裁不過守兵一千
三百餘名而屯兵得邀格外長年賞賚更可以堅
其心而收其力奏入

諭曰現在隨征屯兵勇往爭先歷著勞績但念該屯兵等
每年所得犒賞有限著加恩每屯練一名月給銀五錢

其土都司守備千把外委亦以次量給月餉用示體恤其作何定數增給之處着劉秉恬富勒渾會商妥議奏聞

公又奏言臣查川省徼外山險路窄豈容以業經運出之糧一任奸商轉買交官充數上年臣於綽斯甲布土兵因其尙在本境所有應支口糧議令半本半折此固因糧運艱難起見亦以防贏餘私賣之弊今自去春以來軍儲無缺商運之力爲多但以數十萬石之糧運至數十站之遠其間原不能無弊臣前於乾隆十二三年間卽聞有兌收商

運站員因斛面稍有贏餘遂與奸商私相貿易卽以站上所餘之數作爲商人應交之數從中射利者臣現在雖無所見聞而既有木池盤獲奸商之事則此外各路不能保其必無嗣後惟有總辦糧務之大員及督臣於打箭爐木坪桃關雜谷腦等出口之處特派文武專員不時稽察按月出結具報則奸商自無從覓售而站員亦斷難滋弊奏入諭曰阿桂等奏稱前於乾隆十二三年間卽聞有兌收商運站員因斛面稍有贏餘遂與奸商私相貿易從中射利者各路將軍皆帶兵進剿豈復能分心查辦此事昨

因溫福奏及奸商收買跟役等餘米已諭交劉秉燾
勒渾畱心查辦今阿桂所奏之言則更係大弊該督等
尤不可不切實訪查從重究治

五月初三日

公偕明亮奏言

臣

等旬日以來察看賊番因屢次

潛匿林箐均被官兵設伏截殺是以附近處所不
敢前來惟距大營稍遠深林複嶂官兵不及望見
之地尙有窺探踪跡臣等派撥漢土官兵分陣潛
往散布於山坳林莽遇賊卽殲茲據小金川降番
頭人阿咱拉回稱十五日越過山梁直至喀爾薩

爾對過之沙圖角地方過有打柴兩賊當將一賊
俘縛其一賊踉蹌逃去時值大霧林中突出賊番
二三十名前來接應思欲奪回當被官兵等將所
縛之賊殺死其接應之賊亦被鎗擊死四名餘俱
竄去臣等查當噶爾拉山梁綿亘二三十里官兵
所設營壘處處與賊礮相對東通功噶爾拉喀爾
薩爾西通克舟九寨均有賊礮林立據守此等山
嶺之上溝澗之旁均須分兵駐守如有兵三四千
各連營而下層層接應繞出賊礮後則賊必不能
固守又臣等體察賊情此兩三月以來不過因雪

雨過多官兵難於行走得以稍延殘喘其實此一道山梁地勢延長萬萬不能久爲支禦而以臣等自揣亦必能卽從此攻壓前進一俟雨雪停止自可剋期深入奏入報

聞

初九日

公偕明亮奏言當噶爾拉山梁自二十一日以後雲霧迷漫大雨滂沱至二十六日晚始見開朗賊番卽於亥刻後潛來侵擾革布什咱營盤士兵先已望見滅火靜候俟其來近突然衝殺賊俱踉蹌

奔竄因黑夜打仗未知殺賊多少二十七日卯刻
臣等又令前敵各官兵預爲埋伏而令草布什咱
土兵由南面山溝內潛繞至東面大崖之下賊見
兵無後應蜂擁而出山梁各礮內賊人亦出礮下
壓草布什咱土兵回身接仗而預先埋伏官兵亦
突起截殺共斃二十餘人餘賊仍竄入礮內死守
公又奏言臣於四川邊外各土司及金川賊番光
景兩載以來日夜通盤籌算金川獷悍性成實有
不可不辦之勢况金川賊衆此時已儘數出兵餘
礮所傷日少一日又加以綽斯甲布三雜谷巴旺

布拉克底諸土司斷絕往來與十二三年間情形
迥別且賊衆均已出兵婦女又須背運必不能多
種莊稼則口糧更當缺乏合此數者金川掃蕩之
期雖未可先期預定而斷無不滅之形實於此可
見臣以兵凶戰危從不敢稍存自誇之念且併不
預爲滿足之言然金川之役深知其必不可不辦
又確信其非不能辦何肯意存遷就均奏入

諭曰阿桂奏近日天氣已晴官兵自更易於用力溫福豐
昇額兩路諒亦相同進攻若何深爲廕念又阿桂奏覆
征勦金川一事現在既有必不可不辦之勢又無不能

辦之形所見甚是帝王固以仁育爲量若當不得已而
用兵則義正卽所以成仁豈可專務煦嫗流爲姑息至
現在府庫充盈前後所撥軍需至二千四百萬兩而庫
貯尙有七千餘萬此時惟期勦滅金川爲衆番除害以
奠邊隅卽多費軍需亦所不惜溫福等當深體朕意俾
衆將及各土司咸得聞知共相奮勉迅奏膚功以膺懋
賞

十八日

公偕明亮奏言

臣

等查西山梁第三礮山陰之下

有山腿一道賊番連拏木柵石卡直接梁上大礮

互爲應援防守甚密但攻得此處礮柵餘皆不能固守因派撥漢土兵丁分爲四路於初二日丑刻潛行進發至辰刻之間雨勢大作徑陡泥滑因令官兵徐撤其納扎木官兵撤回之時有賊二三十人出礮衝壓當被官兵擊斃數人餘仍入礮死守至初三日有百餘賊出礮下壓臣等派兵分爲兩翼抄出賊後奮擊亦斃數人賊始奔竄初五日度賊番以爲節屆端午大兵必不前來攻撲或可乘其不備當派各路官兵奮力前進過濠直至礮根其侍衛科瑪所帶官兵並用刀斧將木柵砍斷一

角推倒石牆衆兵一擁而入立將頭人砍死餘賊悉行殲戮生擒賊番六名殺四十三名官兵勇氣倍加乘勢攻撲相連石卡復殺賊二十餘人其山陰林箐中藏匿之賊約有三四百人分作五路捨死來援我兵分頭迎擊賊番力不能支遂竄入礮柵之內併力死守鎗石如雨勢難遽克官兵以次撤回至撤兵時有二十餘賊出礮奔至濠邊官兵鎗箭齊發立斃一半餘賊欲拖尸回去有貴州把總張順獨自躍過濠溝用矛刺死一賊復拔刀手砍一賊餘賊皆遁入礮查賊番於此各礮實爲盡

力死守而我兵因奮勇直前得以多行殲戮稍覺稱快此次陣亡虎鎗營前鋒官德一員受傷藍翎侍衛額魯特袞楚克空藍翎額魯特阿爾查鄂勒哲依貴州守備詹玉書瑚圖禮共五員奏入

諭曰阿桂等奏稱此次帶兵攻奪卡柵戮殺賊衆所有出力奮勉之三等侍衛科瑪著補授二等侍衛藍翎侍衛袞楚克著補授三等侍衛空藍翎額魯特阿爾查鄂勒哲依俱著授藍翎侍衛至虎鎗營前鋒官德陣亡著交該部照藍翎侍衛例議卹

公又偕明亮奏言竊

臣等接奉

廷寄查金川地方確非難得惟不能處處產礦前年金川侵佔草布什咱其境內之默資溝爲出礦之地賊曾遣人刨挖甚多製配火礮則其存積自未用完至屯練士兵軍器刀矛擊刺固其所長而烏鎗更爲素習出入必攜之以行施放頗爲有準此時若遽令其不用烏鎗不但番衆生疑而伊等於攻奪礮卡之處止能短接而不能及遠轉恐難以得力但防範不可不嚴臣等復飭將弁益加設法嚴防又飭令駐扎吉地之副將鄭國卿將默資溝地方時刻嚴查不許一人私挖如有透漏嚴查治罪

奏入

諭曰前此因軍營火葯關係緊要恐番衆私相售賣諭知各路將軍此後土兵毋庸給與烏鎗今據阿桂奏所見亦是此事原當慎之於始從前既已遍給此刻自難復改溫福等各路均仍照舊辦理但須畱心實力嚴查不可泥於土兵愛惜鉛葯之一言遂爾漫不經意致令私售作奸

公偕明亮奏言查當噶爾拉一帶山溝林箐深密四月三十日早間大霧迷漫有賊十數人潛放夾壩官兵久經預備俟賊將近上前迎擊鎗傷數賊

餘俱驚駭踉蹌而去其占朋一名被屯練孛獲屢
經嚴鞠據稱四月內官兵來打山梁礪卡有思都
克覺寨頭人溫布薩爾嘉被官兵鎗傷墜馬衆人
救回等語臣等查四月初間打仗中鎗墜馬賊人
仰蒙

諭旨垂詢正在查訪茲據賊番供係溫布薩爾嘉是金川
最會打仗頭人奏入

上嘉之

二十七日

公偕明亮奏言臣等檢查舊案自前年八月進剿

小金川官兵欽奉

恩旨議叙者尙有至今未經送部之案其陣亡帶傷例應請卹者前任統兵總督從未辦理送部臣等思陣亡帶傷各官兵本屬衆所共知其受傷弁兵從前業經驗明每名皆先給銀一二兩以爲養傷之用則得傷輕重均有檔籍可稽不致冒濫現在臣等復令各鎮將等詳悉確查送部核議庶在事陣傷亡故之官兵均沾

恩卹倍加感奮奏入報

聞

六月初八日

公偕明亮奏言

臣

等思西山梁第三礮卡前此官

兵攻打殺戮頗多賊番已覺窘惶自應乘其氣沮仍從此奮力撲攻當於十四日夜派兵四路十五日丑時先後潛進直逼礮卡木柵力砍溝邊欄木卽以砍斷木植橫搭溝上以便越過卯刻有賊番三百餘繞截而來官兵放鎗立斃數賊其納圍後面東邊箐林內又有賊百餘潛來我兵俟其將近鎗箭齊發殲斃二十餘人

臣

等復同籌議西山梁

第三礮賊番拒守更爲堅固自應另籌攻取之策

查納扎木第二礮與第三礮之間賊番又添大石卡一座若黑夜派兵直取此卡出其不意一得此處可以斷賊來往至第一雙礮陰坡之下又於箐林內踏有小路可以繞越雙礮之後臣等擬於西山梁及納扎木仍派官兵奮力明攻而令繞越之兵俟攻打緊急時突起夾攻可望得手現於附近第三礮之處連擊木柵三座使賊日夜不能休息而我兵不拘何時可以一發卽至賊番自必更爲窘迫奏入報

聞

公又偕明亮奏言當噶爾拉山梁陰坡正西有深
嘉卜一處係布拉克底地方與金川接壤若派兵
潛往循溝而出即可襲取山梁後之克舟九寨臣
等擬於軍營內抽出精銳官兵三四千名密由深
嘉卜繞出乘其不意再向僧達一帶分路攻打則
賊番腹背受攻必至顧此失彼易於克取查軍營
兵力本不敷直下山梁之用今經抽撥難免力單
且采入後亦須隨進之兵臣等仰懇

天恩將新調黔兵二千名撥給當噶爾拉一路則繼進有
兵攻取益爲得力

公又奏言

臣

查三雜谷土司派兵助剿近日頗爲

出力而卓克采之女已經亡故親情斷絕因思三
雜谷地方毗連丹壩總兵五福在彼駐扎與其坐
守該處不如酌派丹壩及雜谷土兵乘其無備之
時突往襲取如能搶得一礮一卡固可張揚聲勢
卽兵丁不能佔守撤回亦屬無妨如此賊番不能
不分兵防守亦可牽綴其勢因諭該頭人等令聽
五鎮調用均稱情願領諾而去如果三雜谷及丹
壩土兵能乘間攻打一兩處則賊酋之勢必分而
三雜谷丹壩各土司益可驗其無往來勾通之弊

均奏入

諭曰僧達一路朕於春間檢閱全圖時覺其地勢稍平且距噶拉依相近曾經指詢自應乘此機會妥協籌辦至所調黔兵二千已全赴溫福軍營備用今阿桂現辦繞路進攻卽照所請准其調取應用阿桂於黔兵到後卽應奮力勦擊乘勝采入設或仍係相持多延時日則阿桂又當分撥一半令速赴溫福軍營以供分勦之用總之所調黔兵惟期用之得當於事有益朕日望各路將軍迅奏膚功並無歧視將軍等亦當深體朕意不得稍分畛域

又

諭曰阿桂奏雜谷地方毗連丹壩總兵五福在彼駐扎已
諭該頭人等以五鎮如有派調土兵之處即可聽其調
撥所見亦是土司等果屬恭順派令攻奪礮卡自當聽
從出力但既係官派卽不便不兼派內地兵丁未免又
分兵勢因思番性貪得而勇於私鬪若餌以攻而有利
當無不踴躍爭先將軍等可妥協籌辦

公又偕明亮奏言

臣等接奉

廷寄

指示烏鎗打仗之理實爲至精至當查賊番所設礮卡多

在峯巒之上故礪外溝濠之底比官兵攀越之路
尙高且將刨出之土堆積如牆其上挖有鎗眼賊
番不必露出頭面已可擊打又且一線細路陡峭
險仄僅能魚貫而登其四面可上並可順溝兩頭
轟擊者百不一遇所以此地用兵之難實不能以
言語形容至於露出頭面之賊已每次皆有殲戮

茲蒙

皇上訓示

臣

等審察地勢指示官兵遵辦奏入報

聞

十三日

公偕明亮奏言查附近四川各省如貴州兵前次挑備三千今除赴綽斯甲布軍營二千外尙有一千可供派撥其雲南額兵本有四萬二千上年止調過三千如再約調二千於各邊關換班分駐之處仍屬充裕至湖北湖南實在有兵三萬六千上年只調過五千若再於湖南省調撥五千亦尙易辦通計需調兵丁五千如蒙

恩准

勅下各省督撫挑派迅赴當噶爾拉軍營合以現有兵力則乘間搗虛賊必不能支禦奏入

諭曰阿桂奏請再調貴州雲南湖廣兵五千爲乘間搗虛之計旣爲此奏朕不肯令作無米之炊所有黔兵一千昨已有旨續調令赴溫福軍營其雲南湖廣各兵二千現在飛諭各該督撫迅爲派撥預備聽候軍營檄調然亦未便專供阿桂之用自當酌量兩處軍營情形撥往於事方有實濟劉秉恬所駐之簇拉角克與溫福阿桂軍營相距不甚遠著卽先赴溫福軍營面商需兵若干再赴阿桂軍營面商需用若干一面具奏一面飛咨雲南湖廣督撫速令起程赴該處軍營毋得刻緩

十七日

公偕明亮奏言初四日據查禮稟稱喇嘛寺糧臺於初二日夜被圍初三日清晨被陷站員通判汪時被害至底木達布朗郭宗傳聞俱被賊番搶佔據跟隨董天弼之兵包應鳳逃出供稱董天弼於初一日夜見事危急令伊子同屯練二名背負印信前來請救董提督隨往官寨存亡不知確耗再總督劉秉恬於木波地方路遇賊番對敵因鉛丸火藥用完不能取勝職道現於崇德牛廠功喀爾拉一帶繞路運往接濟等語查昨日已刻臣等已派章京將備等帶兵前往尙恐勦洗賊番續安臺

站該章京將備等未能悉合機宜查五岱帶兵熟
練現復令其帶領土兵星赴美諾明郭宗等處相
機夾擊並迅速開通溫福劉秉恬兩處軍臺文報
臣等熟察情形苟非底木達布朗郭宗一帶小金
川降番有潛行勾引者金川賊人斷不至如此猖
獗臣等一路降番已將精壯之人挑在隨營打仗
其餘各本寨內老弱居多現在亦俱安靜但番夷
之性究未可信臣等現復添派兵丁於緊要隘口
嚴行把守並派妥人至各寨曉諭安撫藉以察其
動靜實可無虞意外奏入

諭曰底木達布朗郭宗兩處若果爲賊番侵佔海蘭察一
到自必奪回並卽通道安臺其事爲現在第一要務若
尙未辦妥阿桂卽親自領兵馳往底木達將此路迅速
籌備萬全再辦進攻至底木達失事皆董天弼辦理不
善所致但劉秉恬在彼不早查叅亦未免失之大意溫
福等向後益當加意經理於軍務方爲有益其喇嘛寺
糧員被賊傷害俟此事辦完後再行咨部查明議卹

十八日

公偕明亮奏言初五日據查禮稟稱初四日辰刻
溫將軍派有都司守備帶兵來抵崇德大牛廠防

守糧臺等語臣等三四日以來於賊番侵擾情形
僅接該道稟帖而溫福處並無來文明係賊番佔
斷軍臺以致不得木果木軍營消息實深懸切酉
刻接劉秉恬初三日來札稱底木達賊衆甚多業
已失守初二日傍晚賊番已抵登春初三日早溫
將軍先撥兵一千名令海參贊等帶領前來然賊
番等已據木波並搶佔喇嘛寺糧道不通若再將
美諾明郭宗佔據則西南兩路盡行阻梗關係甚
大等語查劉秉恬處既有海蘭察等帶兵一千名
則登春一帶自可無虞但又據查禮報稱賊番已

圍困破礪及帛噶爾角克礪臣等思賊番如此猖獗今海蘭察等既帶兵來援若再撥精銳兵丁交與五岱奮力前進以成夾攻之勢庶可將賊番痛加殲戮又同時接到海蘭察咨稱初三日聞賊已往帛噶爾角克礪恐其佔據美諾及明郭宗之路若從南路派兵佔據明郭宗美諾由喇嘛寺一路進攻本參贊即可開通道路等語臣等隨派出和隆武等漢土官兵五百名星夜前往破礪等處接續五岱之兵總期併力勦殺早開糧道臺站至美諾明郭宗一帶雖可無虞但該處所有員弁均非

幹練之人草任總兵英泰人尙老成當添派兵一百名令其前赴美諾暫行彈壓防範查底木達布朗郭宗距臣當噶爾拉軍營路程遙遠而距木果木軍營本近此時溫福處援兵漸集克復當亦不難

公偕明亮又奏言賊番悍惡狡詐顯肆鴟張實堪切齒不但賊酋賊目等當予寸磔卽將其男丁盡行屠洗亦罪所當然此時賊衆雖侵擾底木達布朗郭宗各處而現在隨軍營之草布什咱巴旺布拉克底明正各土兵未嘗稍有驚疑觀望是金川

之不可不滅斷無不滅實可以必操其券至賊境
本屬彈丸何以所用火礮鉛丸尙能接濟臣等久
已詳加體察查默資溝係草布什咱地方產礮稍
多前年爲金川所據賊人卽於此刨挖礮斤去年
三月間克復草布什咱之後默資溝已撥有官兵
駐守惟聞正地亦出礮斤然不能如默資溝之多
目下大兵四面合攻賊番所用火礮自當日形缺
乏至臣前奉

諭旨以軍營大礮轟擊賊碉漸就破損何不并力轟打碉
根查當噶爾拉前敵各營盤內築有高大礮臺對

準施放原皆直達礮根但所有打塌礮上石塊墜
至礮根日積日厚賊番奸狡異常非但不爲除去
轉從而加增卽爲擁護礮根之用大礮至此不能
得力賊番又於其內豎立木植遮護死力拒守但
事機一至賊番卽有堅礮亦無從守禦臣等此時
惟有督勵官兵或繞路夾攻或相機勦撲以期迅
速集事均奏入

諭曰阿桂等接到劉秉恬信知海蘭察已至簇拉角克地
方勦擊賊匪並派和隆武等前往接應所辦俱合機宜
溫福阿桂兩處派往之兵已有二千海蘭察復行知溫

福添兵一千而博清額富勒渾所帶之黔兵二千陸續踵至軍聲益壯賊自披靡此次所調黔兵原爲添助進剿之用不期於此大得其力亦與從前阿里袞等送馬之兵適到卽解兆惠黑水之圍相仿此卽破賊之先兆也至金川賊衆現於各路防拒官兵焉得復有多人至此一路滋擾據所報登春至木波橋一帶賊已不少其喇嘛寺等處糧臺又有賊番圍佔尙有佔據底木達布朗郭宗兩處之賊總計之不下千餘或糧員等一聞賊至驚惶無措過涉張皇草木皆兵勢所不免亦不足深責但賊斷不能糾衆遠來自係小金川降番勾引賊至

卽從而助惡故覺其多此等降番敢於反覆若此事平之後若不悉行誅戮何以使諸番畏威知懼但斬戮太多恐致衆番驚擾務須設法密辦除惡安良方爲妥善總之金川賊衆狡惡異常不可不知慎重昨豐昇額等一路已諭其俟續調滇兵到營方可深入卽溫福阿桂兩處或攻得一二險隘有可進之機亦須照顧後路無虞方不致墮賊前讓後邀之計其丹壩一路之兵令五福帶領預爲堵截原以防賊曾從彼軼出但獨當一面恐尙不足恃豐昇額等現在達爾圖日旁攻剿設賊衆守拒甚嚴急切不能攻進或畱舒常帶兵在彼牽綴賊

勢豐昇額卽分兵前往率同五福防堵丹壩一路較爲得力是否如此可行不妨商之阿桂溫福不必因朕有此旨強爲遷就也又阿桂另摺奏賊番火葯尙未匱乏之故實不可解向據奏各路官軍進剿均拋擲火彈聞係皮包實以火葯引以葯線計一火彈所需之葯不下數觔而所裝必仍係鎗葯官軍拋擲時不能保葯線之皆燃反以火彈之葯供賊番鎗礮之用殊爲失算因思鎗礮之葯性係直轟爆竹之葯性係橫炸若裝火彈時卽按爆竹葯料配用自更有力卽或賊番得之用以放鎗必致炸裂是在我卽有棄材而在賊轉受實累縱火

彈拋擲不著亦無藉寇兵之患其情形是否如此並著
將軍等查明妥酌爲之

恭錄

御製詩

復雨 六月二十四日夜

復雨輒復愁我愁紛有故間作非膩霖大田未潦洳所慮
漲水發怒波衝驛路軍書眇孔亟遲或誤裁務困獸竟反
噬猖獗邀隙遽初爲遁逃藪繼乃狼狽助縱回驛根臺遮
鄰更險據小金川逆僧格桑與小金川逆僧索諾木狼狽
爲奸侵吞隣境抗拒王師不得已命將申討去
年冬攻克小金川僧格桑窘迫喙走由美臥溝窺入金川
大軍進剿期於掃蕩賊巢并擒逆豎維時命董天弼駐守

底木達等寨以扼美卧溝要隘孰意僧格桑復萌逆惡於
六月初一日竟從去路潛來冀佔舊巢並擾軍營後路乃
董天弼庸懦無能先既退居美諾及温福嚴飭始回底木
達仍另立一小營不在官寨防守致為賊酋窺伺乘間攻
破即佔據底木達布朗郭宗兩寨並煽惑降番復叛搶奪
帛噶爾角克礪科多一路根臺復截木果木後路逆酋罪
大惡極實為覆載所不容而董天弼之玩
懦貽誤亦罪有餘辜矣思之深切憤懣
還軍有此跌懦

卒散羣驚致失我賢臣痛惜言難喻

先是温福稱劉秉恬札知賊番侵擾檄臺

之信即派參贊海蘭察統兵馳赴劉秉恬處援勦藉以無
虞不期初十日且竟侵至木果木山後而駐防之德爾森
保毫無措置以致失守賊遂竄入温福軍營綠營兵眾見
賊先驚倉皇潰散僅存滿洲兵百餘温福率以擊賊竟致
受創捐軀聞信深為震悼雖加恩贈襲伯爵祠祀
昭忠並賚貲助喪實不足以喻我痛惜之懷耳
旗兵之

未遣綠營之徒付圖省從公議可恃忘深慮

去年春已簡派八旗兵三

千備赴軍營因温福阿桂俱奏滿洲兵一人費至綠營三
倍欲多用綠營兵可不發京兵遂為其言所惑不復深計

因而中止設使溫福軍營賊至時有滿洲兵千餘在彼則
緣營得所依恃亦不致潰窺失事是仍由溫福自誤予之
輕信亦誤今悔已無及矣所幸阿桂一路調度得宜收戮
叛番斷其內應復分路掩擊殺賊四五百衆並清章谷後
路臺站軍心鎮定糧儲軍火充餘足資倚任因卽命爲定
邊將軍並派健銳火器營兵二千吉林黑龍江兵二千伊
犁厄魯特兵一千迅赴軍營重
籌進剿以申國威而張捷伐

追悔何嗟及聚銅大錯鑄

賊計誠益詭賊罪越難恕禁放發精勇雪仇無返顧

天日鑒曲直我豈爲窮黜

叶兩金川之役初意並不欲加兵而逆酋等敢於黨惡逆命遂

不得不加申討乃竟抗我顏行勢難中輟曲直所在

蒼自能昭鑒並非予之有意窮兵黜武吾誰欺欺

今逆酋詭變若此實爲勤勞遑敢辭國威要揚布

天乎

時溫福在木果木兵潰陣亡公偕明亮奏言

臣等

思木果木一帶降番既經蠢動則當噶爾拉後路

小金川各寨均應先爲防禦稽察旋於本月初七日申刻據現在軍營之頭人阿申稟稱色木則有金川賊人教令今夜同反飛速稟聞等語臣等思色木則西南山下爲僧格宗至當噶爾拉必由之路其東南山下係僧格宗礮寨甚關緊要卽令委署前鋒參領西當阿等帶兵往佔色木則礮寨而賊番已先窺入又於初八日據按察使李世傑等稟稱本日子刻賊番侵擾科多臣等以科多一站係從美諾前至僧格宗之路不可不亟爲剿殺開通遂派舒景安等帶領駐防滿兵速往救應又思

僧格宗派有寧夏鎮總兵張玉琦駐守但地居扼
要現在存積鎗葯軍糧甚多雖派巴旺布拉克底
土兵助守兵力尙單復派漢官兵前往協同守禦
酉刻據舒景安稟稱協領武靈保遊擊阮寧方由
僧格宗南邊過河已將賊番擊敗又據李世傑稟
稱拏獲小金川放火埋伏賊人十六名已於當晚
正法等因臣等思色木則與僧格宗北山本係一
道山梁而色木則礪座甚多復派黔兵令奎林等
帶往相機攻打臣明亮往來督催策應查金川賊
番引誘小金川人陰謀斷路實爲可恨可惡幸而

均經敗露得以先發制人而臣等又已預將渡船
收起使河南河北之賊不能交通信息以破其牽
連並發之局現在當噶爾拉軍營軍心鎮定儲侍
充餘鉛礮均敷應用自可無虞意外再十二日子
刻有賊三四百名直撲納圍之陝西官兵營盤經
叅將劉輝祖督兵拒擊痛加勦殺黎明賊人始俱
敗遁查金川賊人勾引小金川賊衆由底木達一
帶前來原欲先斷木果木登春兩處後路因臣等
節次派兵往援遂欲兼斷美諾當噶爾拉中間之
路其狡獪之計險惡異常今已先爲發覺一面派

兵勦堵一面設法部署因得稍殺其勢此等惡逆賊犯槩予駢誅實所應得但自僧格宗西至卡丫約咱兩岸礮寨相望官兵駐守爲數甚少實不能分兵四出逐一勦洗因派明正巴旺布拉克底各頭人帶領土兵會同此一帶隘口駐劄之官兵將當噶爾拉以西各寨男番盡數調出收其軍器其稍有桀驁者或登時殺死或細縛拋入河流其餘分送至章谷及打箭爐酌賞明正等三土司並諭駐劄章谷及署打箭爐之同知等察看酌賞如各番內稍有可疑者立時殲戮現在據報辦理已經

就緒此時各寨上惟有婦女幼穉後路似可無虞
至當噶爾拉山梁降番所駐之處距賊礮不遠伊
等狡譎異常若知大兵必欲盡殲卽不敢倒戈相
向亦必盡竄金川臣等此時除查有叛逆實跡者
卽加誅戮其餘實不能一時盡數痛辦今臣等將
頭目數人留在營盤之內令將領密加看守再飭
各土兵察看降番等言語光景並令明正巴旺布
拉克底各土兵分管同住俟可以辦理之時卽令
嚴辦臣等因後路所關甚重惟思先除內應稍免
返顧之虞奏入

諭曰阿桂奏現在派兵防守殺賊多人并設法將叛逆降
番羈其頭人殲其醜類勦清後路軍心俱爲鎮定等語
所辦深合機宜著卽命阿桂爲定邊將軍俟京兵等到
齊另籌進剿務須掃蕩賊巢殲兩首逆以雪憤恨而申
威令

恭錄

御製詩

喜晴

六月二十五日

歷辰猶細霖傍午遂大霽農功幸益佳軍營亦信遞

自臨

軍營失事之信阿特軍報數日不至其後路科多新新
一帶亦有賊梗阻深爲懸注今早始得其十三日所奏

營寧貼情形乃另從章谷一路馳遞者覽之始得慰懷 未然防已周先覺誅奸細從

逆盡勦滅可疑亦別置以此當噶拉安然若無事總俟重

進師應迴美諾至阿桂一聞賊匪侵擾底木達布朗郭宗

防範復偵知降番被煽從逆者多即遣兵分路勦洗其有

自金川潛至番寺者即并喇嘛誅之並將近寨丁男移置

他處收其兵器而頭人之可疑者則禁之營中不令回寨

是以當噶爾拉全營軍心鎮定因諭阿桂即撤兵回至美

諾殲除羣賊收復底木達等寨並擒逆豎僧格桑將小金

川全境廓清駐軍以待京兵至日另籌進剿是阿桂一軍

之安所繫甚重固由其調度未逮難收拾嘉護感

有方亦實賴 上天嘉祐耳

天賜

二十九日

公偕明亮奏言臣查美諾至價格宗一帶道路尙

在未通則由當噶爾拉前往章谷之後路亦慮賊番搶劫此一路小金川寨落甚多其山後又通金川賊境恐賊番乘間竄入藉以佔據尙須添兵防守因思布拉克底之臨卡地方從前駐有官兵酌抽五百名派令防禦其色木則一處賊番先已竊據礪寨夜間來擾營盤經奎林等督率官兵屢次奮力掩殺連日以來不敢復行滋擾至逆酋等雖在西路得志較前猖獗然乘其不意攻打一二處亦足以壯軍心而寒賊膽臣等遂派都司崔文傑帶領各土兵於十三日夜由木則後山攀附而登

潛抵賊卡之下直前擁入賊番驚竄官兵趕殺多
人餘俱逃散臣等思賊番行同鬼蜮或從山箐爬
越侵犯納圍糧站亦未可定維時委署參領觀祥
適帶護礮兵百餘名卽飭其畱駐以資防護傍晚
所調草布什咱土兵亦至是夜果有賊二百餘人
攻撲糧臺漢土官兵合力迎殺賊衆受傷拖曳而
去者約十餘人至河南拉約等寨探得寨內藏匿
賊番漸有舉動之勢十三日夜派兵前往十四日
早間分爲三路直上攻打一面痛加勦洗已將寨
落焚燒至僧格宗對河柴寨賊番聚集更多十五

日復令都司崔文傑等帶兵渡河陸續進攻賊番
悉力死鬪爲官兵殺死五六十人寨落亦俱焚燬
現在河南惟未動之宅壘兩寨暫且存留其河北
自僧格宗起至約咱止河南自卡丫起至榮寨止
小金川賊番俱已盡淨其榮寨以東尙有鳩瑪爾
里等寨與賊固結拒守必須勦完各寨則河南一
路卽與美諾開通昨據海蘭察來信附近鳩寨之
零星寨落逐一攻破而臣等所派往勦鳩瑪爾里
之官兵亦於十六日夜前往十七日遙望是處山
上起火想卽日可以勦洗克復統俟兩軍會合再

剿除河北之彭魯爾等寨則美諾河西亦可掃盡
奏入

諭曰阿桂等所辦深合機宜且殺賊亦多甚屬可嘉著將
奮勇出力之弁兵查明咨部議叙至目下最要之務必
須卽將底木達布朗郭宗兩處上緊克復阿桂奉到此
旨卽或河北羣賊尙未殺盡亦當由河南一路回至美
諾與海蘭察等會合再發兵剿洗河北之賊更爲得力
惟撤兵時應將後路料理周密勿使賊衆得以尾躡
公又奏言兩金川賊酋猖獗如此卽寢皮食肉亦
難釋恨惟木果木一帶大經挫損不得不爲添兵

辦理俟得悉彼處確實情形並應調何處之兵臣
另籌具奏奏入

諭曰阿桂等奏稱俟定有應調之兵另行具奏看來阿桂
此時亦知從前伊等所奏無需滿洲兵之錯矣今統計
現調兵有一萬二千名兵力甚壯復繕寫諭旨曉諭各
土司伊等接到後通行曉諭各番一面揚言已調十餘
萬精兵前來合剿則賊酋聞之喪膽震動而各土司聞
此亦可定其游移之志